

Segun Monica Kock Presidente SMJI

Juancho Irausquin: un politico cu curazon pa su pueblo

Recordando su fecha natal 3 di december



Sr. Juancho Irausquin (q.e.p.d)

ORANJESTAD - Stichting Monumento Juancho Irausquin kier riba e dia natal di Juancho Enrique Irausquin 3 December conmemora tur e logronan di Juancho Irausquin cu a trece cune cu Aruba a drenta den un era completamente nobo y cu te cu awe nos ta tin e frutanan di su vision y deseonan. Juancho Irausquin tabata un persona cu tabatin e vision pa traha proyectonan y tin ideanan pa termino largo.

Su plannan tabata amplio y riba tur tereno. Dor di planifica Juancho Irausquin por a logra pa desaroya Aruba grandemente pero na mesun momento a pone e fundeshi pa leynan pa proteha e personanan di menos of ningun recurso (ley di pensioen, ley di viuda y Huerfano, ley di oportunidad na tur persona

pa desaroya nan mes pa nan tin posibilidad den bida pa progresa (ley school liber, beca) y alaves proteha e trahador (Ley di minimum loon, ley di CAO).

Juancho Irausquin tabatin een tien jaren plan locual e a laga atras y PPA den e espiritu y vision di Juancho Irausquin a logra pa ehecuta esaki. Juancho Irausquin tabata e fundador di locual nos tin awe cu nos ta tuma "for granted." Stichting Monumento Juancho Irausquin pa medio di esaki ta recorda un par di e logronan di Juancho Irausquin cu nos no mag di lubida.

Juancho Irausquin tabatin e vision pa desaroya y salvaguardia Aruba. Juancho tabata desea un otro entrada pa Aruba pa Aruba no depende di Lago cu tabata e pilar di entrada principal pa Aruba. Juancho tabata kier un segundo pilar di entrada por si acaso Lago lo sera un dia. Hopi hende a bisa cu esei nunca lo pasa.

Cu e entrada di turismo planea dor di Juancho Irausquin un era Nobo pa Aruba a cuminsa. E fundeshi economico di nos pais a

wordu poni. Ta Juancho Irausquin pa medio di PPA a pone number di Aruba ariba mapa Internacional y a habri caminda pa miles y miles Arubiano por labora den sector di Turismo.

Juancho Irausquin ta e fundador di Turismo, e persona cu tabatin e vision cu Aruba lo bira un Miami chikito. Ta e vision di Juancho Irausquin a pone Aruba drenta den un era nobo cu a trece desaroyo y prosperidad pa Aruba. Su plan pa garantisa entrada pa Aruba a traha na momento cu Lago di berdad a sera y asina a salvaguardia Aruba hasta despues cu e no tabatei mas. Awor Turismo ta nos pilar di entrada mas grandi di Aruba. Loke Aruba ta awe ta danki na e vision di Juancho Irausquin. Un Arubiano cu a cambia Aruba pone den un era nobo.

E pensioen cu nos tin awe cu nos ta tuma manera ta algo normal ta algo cu Juancho Irausquin a laga atras pa nos. Juancho Irausquin tabata kier pa e progreso cu e a trece pa Aruba lo ta pa un y tur.

E no a lubida riba e grandinan y a zorg pa tin un

ley pa segura e entrada pa e grandinan. No por nada e tabata wordu jama Sirbido di Pueblo. E la traha pa segura un entrada pa personanan cu menos of ningun recurso y cu ta den dificultad manera e grandinan, viuda y huerfano of personanan cu awo ta ricibi onderstand. E no a lubida riba nan ora Aruba tabata den progreso.

Juancho Irausquin tabata kier pa tur hende por tin e mesun oportunidad pa por desaroya su mes. Educacion ta e manera pa un persona desaroya su mes pa e por bai dilanti. Pa e tin oportunidad den bida. Pa logra esei Juancho Irausquin a bin cu scol gratis y cu studie beurs (beca). Asina Juancho a percura cu tur mucha lo haña un educacion pa nan por tin oportunidad den bida. Ainda tin hopi mas logro di Juancho Irausquin. Fundacion Juancho Irausquin ta haña e importante pa e pueblo no lubida un persona asina grandi pero cu curazon humilde cu a traha duro pa nos pueblo. Nos no tin cu lubida nos heroe cu nos pais tin.